



## 28 GÜN 2017

**Via dals nanins a Tarasp.** La Via dals nanins chi maina da la resgia da Plavna fin a Godplan sur Tarasp es gnüda inaugurada. Ella es gnüda lantschada da la scoula primara da Tarasp cun lur magistra Aglaia Gallmann e da la Pro Tarasp-Vulpera.

## 29 GÜN 2017

**Nouv schefredacter pro RTR.** Il giuven da Glion Flavio Bundi succeda a Gian Ramming sco schefredacter da Radiotelevisiun Svizra Rumantscha. In sia funcziun a partir dals 1. november 2017 es el responsabel per la sporta da radio, televisiun ed online da RTR.

## 29 GÜN 2017

**Vernissascha dal nouv cudesch da Dumenic Andry.** L'autur e romanist Dumenic Andry ha preschantà seis nouv cudesch da poesias cul titel «sablun» i'l Globe a Zuoz. El es cumparü pro la Chasa Editura Rumantscha e cumpiglia 78 poesias. Per l'accumpagnamaint musical ha pisserà Andri Steiner, Annetta Ganzoni ha fat la moderaziun.

## 1. LÜGL 2017

**Festa da la luotta a S-chanf.** Per la prüma jada es gnüda realisada cun sustegn d'üna tschientina da voluntaris a S-chanf üna festa da la luotta dals chantuns Grischun e Glaruna. Il Grischun Armon Orlik guadogna cunter il Glarunais Roger Rychen. Sonia Kälin dad Einsiedeln es la vendschadra da las duonnas.

## 4 LÜGL 2017

**Angelika Overath a Segl Baselgia.** Illa Biblioteca Engiadinaisa da Segl Baselgia ha l'autura Angelika Overath da Sent preschantà seis cudesch «Gebrauchsanweisung für das Engadin», ün manual per inscuntrar l'Engiadina chi serva tant a giasts sco ad indigens.

## 5 LÜGL 2017

**Spassegiada rumantscha tras Sent.** La Lia Rumantscha ha invidà a persunas interessadas a gitas rumantschas tras il cumün da Sent. Il collavuratur regional Mario Pult maina tras la spassegiada bilingua «Per giassas e straglias» muossond eir ün o tschel pled rumantsch.